





# Zwergalserin

Rundbrief für Kinder

Nr. 13 ■ Oktober 2024





Da boarische Löwe begegnet uns oft  
in Bayern.

Ned nur auf de Kinderseitn vom  
Rundbrief, sondern aa in da Stadt  
München, in Ottobrunn, in Lindau  
und an ganz vui andere Orte.

Hoids de Augn auf, nacher  
weads sicher dem oan oda  
andern übern Weg laffa.

Des boarische Wappen wead normalerweis von zwoa Löwen ghoidn.

Bei uns hoids bloß da Leo Löwe.

Obn rechts siegt ma an goldenen Löwen auf schwarzem Grund.

Des war ganz früher des Wappen vo de Wittelsbacher, ana ganz wichtign und mächtign Familie in Bayern.

De Wittelsbacher hobn se sogar echte Löwen ghoidn.

Da Löwenmeister hod auf de Viecherl aufpasst und sich um de kümmert.

In Minga im Oidn Hof is zum Beispui seit 1491 a Löwenmeister ogstellt gwesn und auf der Landshuter Burg Trausnitz hods an Löwengraben gebn, der a heid no dahoidn is.

Vor 20 Jahr war in Minga de BUGA und zwoa Joahr spada de Fuaßboi Weltmeisterschaft zu Gast.

Do hobn se a paar einfallsreiche Leid überlegt, Löwen in da Stodt aufzustellen, de Künstler ganz bsonders hergricht hobn.

De hod ma kaffa kinna oda a Patenschaft übernehma und des Geld is fia guade Zwecke spendt wordn.

Wen des intressiert, der konns auf [www.loewenparade.de](http://www.loewenparade.de) oschaung und nochlesn. A heid no siegt ma bunte und bsondere Löwen in da Stodt. Hoids eire Augn auf!





Aber warum jetzt eigentlich da Löwe?

Ma hätt ja aa a Mankei nehma kinna ois Wappen – und Symboltier fia Bayern. Oda a Imp oda a Katz.

Da Löwe, des is da König der Tiere. Da Löwe hod Kraft, is wuid, kann se wehren, is stoiz und er is groß und stark.

Des san oiss Eigenschaften, de früher ganz wichtig warn, um a Land, des ma erobert hod, aa zum bhoidn.

Und zugebn muasst as ja scho: Da Löwe is scho a bsonders scheens Viecherl.

Genauso wie unsa Bayern a ganz a bsonders scheens Fleckerl Erdn is.

**Herausgeber und Verleger:**

Förderverein Bairische Sprache und Dialekte e.V.  
Salzburger Str. 62a, 83435 Bad Reichenhall  
Telefon: 0865 1-7680098  
E-Mail: [info@fbsd.de](mailto:info@fbsd.de)  
Internet: [www.fbsd.de](http://www.fbsd.de)

**Bild, Grafik und Text:**

Birgit Hackl, Baldham  
Claudia Geisweid, Altomünster